

Problemanan petroleo y refinaria ta escala rond mundo

# Mester atende incertidumbre sector local di energia

\*Citgo Aruba, FMSA, RdA mester haya claridad awor

\*Caracter legal di acuerdo mester wordo estableci pa Aruba



ORANJESTAD (AAN) -- Recientemente Ministro Presidente a anuncia un plan total pa atende cu e problemanan cu a surgi cu Citgo. Mientrastanto diariamente, manera por a spera for di 2016, desayonan nobo ta mira luz den sector di petroleo y refinaria rond mundo. Situacionnan alarmante ta presenta y sigur ta duna motibo pa Aruba actua riba tereno gubernamental.

DIARIO mas cu nunca ta mantene contacto cu informantenan cu, manera tempo a muestra, a guia DIARIO pa por a presenta un panorama realistico na pueblo di Aruba.

E situacion mundial, manera for di aña pasa a wordo revela den articulonan cu DIARIO a presenta, ta exige pa pasonan importante wordo tuma.

Na prome luga, Parlamento cu for di 2018 tin tur documento relaciona cu e acuerdo di Citgo, mester bini dilanti. Informantenan a indica, cu na prome luga mester bay determina si e acuerdo tin balor. Esaki ta pone un fin na loke ta un aventura y incertidumbre planea den mundo di energia na Aruba.

Mientras petroleo ta motibo di crisis mundial, e entrega di combustibel cu ta dicidi pa mercado local y economia, ta keda den man di Citgo, cu ta un incertidumbre y inseguridad riba su mes.

Segun informantenan awor mester busca un alternativa pa entrega di energia riba mercado mundial mientras na mes momento ta afirma e caracter legal di e acuerdo. Si e acuerdo no tin caracter legal, Aruba por pone fin na e acuerdo na momento cu e ta desea y busca un solucion.

Informantenan di DIARIO no por comprende con sin mas ta busca solucion pa un

acuerdo cu segun organo di estado Raad van Advies no a wordo alcanza na forma legal. E caracter legitimo ta na duda den un documento cu nunca Parlamento mester a firma sin a haya oportunidad di tuma nota di e contenido.

"E forma cu a introduci Citgo na Aruba ta un bofon den nos estado di derecho," un informante clave a trece dilanti y a muestra cu ta tempo pa organonan oficial di estado dicidi riba legitimidad di e acuerdo.

Importante ta pa kibra incertidumbre riba futuro directo di Aruba, cu segun un orden nobo den e acuerdo ta den man di FMSA, un di e entidadnan huridico cu a wordo uza den henter e puzzel legal di Citgo, cu nunca a haya aclaracion.

"Aruba no por ta papia cu mundo mientras Aruba mes no sa si e documento cu a firma cu Venezuela pa Citgo tin validez," a wordo muestra na DIARIO.

Loke Aruba mester tene na consideracion ta, cu Aruba ta confronta un mundo di problema di wordo acusa di complicidad criminal te e punto cu e crisis mundial por resulta sumamente negativo pa Aruba.

Na e momentonan aki diferente asunto cu te awor tabata scondi, mundialmente ta bini dilanti.

E crisis di petroleo cu a keda latente for di añanan 80 y a ocasiona cu Lago a cera, ta e problema grandi cu ta rementa rond mundo y tambe ta origen di e desaster na Venezuela cu ta uno di e centro di operacionnan petrolero di paisnan y organisacionnan comunista of hasta liga a asuntonan grave.

Aruba awor mester atende tur aspecto interno di e acuerdo,

mira con e ta afecta Aruba riba tur nivel pa e ora bay sigui cana riba posibilidad pa

futuro.

Mientras no defini Citgo pa por tuma un decision final, no

tin progreso den un situacion cu nunca mester a desaroya su mes na un pais democratico.